

漢書地理志
校注

長洲貝蘊章題

集 校

書 注

地

理

志

長洲真如堂藏

光緒二十有二年五月

蕭文陳寶至樓閣周

皇清賜進士出身資政大夫兵部侍郎兼都察院右副
都御史巡撫福建等處地方提督軍務兼理糧餉

南陔王公墓志

賜進士出身儒林郎翰林院庶吉士加一級受業族子

端履謹譔

賜進士出身儒林郎翰林院庶吉士加一級世愚再姪

陶恩培書丹

賜進士出身文林郎直隸天津縣知縣世愚姪周 棫

篆蓋

道光乙未秋八月先師原任兵部侍郎兼都察院
右副都御史巡撫福建等處地方提督軍務兼理

糧餉族父南陔公壽終里第彌留屬續神明不衰
老成云亡宗族殄瘁是可哀已公以名進士出宰

閩中蒙

仁宗睿皇帝特達之知由縣令游任封圻

眷注優渥垂二十年公躬膺重寄矢清矢慎陳綱肅紀
百廢具舉有古大臣風焉卒以鞠躬敬畏呈議罷
職公自念身介危疑悚惶無地

聖恩寬大逾格矜全感激涕零戰兢沒齒杜門謝客殫
心著述又十有九年成周人說經八卷周人禮說
八卷禮堂集義四十二卷儀禮圖十七卷石渠議
逸文攷一卷董仲舒詩說箋一卷匡說詩義疏一

卷漆書古文尙書逸文攷一卷附杜林訓故逸文
桑欽古文尙書說地理志攷逸合一卷附中文尙
書齊論語問王知道補亡一卷夏大正逸文攷一
卷弟子職古本攷一卷凡將篇逸文注一卷漢書
地理志校注二卷袁宏後漢紀補證三十卷管子
地員篇注四卷老莊急就章一卷說文段注訂補
六卷讀書雜記十二卷思惟居士存藁十卷唐人
宮詞鈔三卷古詩鈔二卷李杜詩鈔四卷王氏泰
支瓜瓞譜七卷均手自寫定說文集注一百二十
四册未及脫藁今年春公輯瓜瓞譜復備述受
國厚恩涓埃未報身歿之後不敢乞銘當代燕許鉅

筆迺命端履志蕕幽之石諄諭質而勿文毋騁妍
抽秘貽羞諛墓端履謹誌不敢忘孰謂天不憖遺
哲人其萎日月有時復歸于土孤子曼壽等將以
冬十二月奉公匱於城南十九都河南莊之邊啟
元配蔡夫人之兆而合葬焉爰契我龜卜云其吉
載申先訓請志貞珉惟公含和履仁篤信好學敦
樸慈壤砥礪廉隅孝乎惟孝施於有政視民如傷
若保赤子居上不驕恭而有禮舍之則藏知止不
殆燕居申申鄉黨恂恂鬻饘餬口歌哭全要生榮
死哀可謂無遺憾矣至

恩綸治行例載史館道德文章光昭宇宙毋俟端履再

述謹遵治命詮次世系官階生平子女使後世有所考見焉

公姓王氏諱紹蘭字畹馨號南陔晚年自號思惟居士世居蕭山西河里先世定二公諱汝楫自邑桃源鄉遷居城南蘇家潭是爲西河始祖十二傳至晉三十五公諱進公曾祖考也無子以晉二十五公子永三十一公諱國和爲後公祖考也子振十二公縣學生諱模公考也三世皆以公貴 贈通議大夫福建按察使曾祖妣氏蔡祖妣氏郁妣氏蔡皆累 贈淑人妣氏嚴累 封太淑人公由乾隆壬寅科試以第一名入縣學丁未戊申歲科

試皆第一補廩膳生充巳酉科拔貢生中式壬子
科順天鄉試第九十四名舉人癸丑科會試中式
第三十一名

殿試三甲第二十一名

賜同進士出身引

見奉

旨以知縣分發籤掣貴州時嚴太夫人年逾六十循例
告近改掣福建題補屏南縣知縣充乙卯科福建
鄉試同考官調補惠安縣知縣未任復調閩縣知
縣嘉慶己未撫臣保舉送部引

見奉

旨仍回福建以知州用借補泉州府馬家巷通判充辛

酉科福建鄉試內監試官補授泉州府知府洊擢

興泉永道福建按察使洊擢福建布政使福建巡

撫再署閩浙總督兼理鹽政丙子科福建鄉試監

臨官武鄉試主試官公生於乾隆庚辰年二月十

七日卒於道光乙未年八月二十二日春秋七十

有六元配蔡夫人同邑國學生諱國柱公女 誥

封淑人例晉夫人生於乾隆戊寅年十二月初九

日卒於道光癸未年七月十九日春秋六十有六

側室李孺人子男四人長曼壽候選府同知蔡夫

人出娶蔡氏同縣國學生諱濱公女次養壽聘同

縣庠貢生蔡諱梁公女次元壽次祿壽俱李孺人
出女二人長適山陰候選未入流顧文煌蔡夫人
出次許字山陰原任山西蒲州府知府徐諱秉鈐
公子李孺人出未嫁卒孫男二人長曰愨廩膳生
次曰惠孫女一人曾孫二人希范希曾

漢書地理志校注卷上

原題校字今據墓志更正

蕭山王紹蘭箸

同邑後學陳光淞校刊

京兆尹

王莽傳分三輔為六尉郡據三輔黃圖渭城安陵以

西北至栒邑義渠十縣屬京尉大夫

三輔並無義渠惟北地郡有義

渠道疑遠或莽於三輔屬縣別有分改

是分右扶風所屬置京尉郡也

高陵以北十縣屬師尉大夫是分左馮翊所屬置師

尉郡也新豐以東至湖十縣屬翊尉大夫是分京兆

尹所屬置翊尉郡也霸陵杜陵東至藍田西至武功

郁夷十縣屬光尉大夫是分京兆扶風所屬置光尉

郡也茂陵槐里以西至汧十縣屬扶尉大夫是分右

扶風所屬置扶尉郡也長陵池陽以北至雲陽被裋
 十縣屬列尉大夫是分左馮翊所屬置列尉郡也莽
 蓋統舉三輔之地錯綜分之為六尉郡實則改京兆
 為京師馮翊為翊光扶風為扶列故莽傳言大司馬
 保京尉扶尉大司徒保翼尉光尉翼翊通用大司空保師
 尉列尉翊光連舉大司徒保之而京與師扶與列皆
 分屬大司馬大司空所保是亦參互言之矣漢志於
 六隊郡皆云莽曰某隊宏農曰右隊河東曰洮隊河
 內曰後隊潁川曰左隊南陽
曰前隊惟滎陽下今奪莽曰
 祈隊四字非漢志本如是也於三輔下皆不云莽曰
 某尉此非省文亦非闕文蓋莽所分屬互相雜廁難
 以分別部居耳莽傳又言甄豐子尋為京兆大尹似

京兆之名不改今詳攷之此文在始建國元年初改
官名以後故稱大尹在天鳳元年改郡名以前故稱
京兆其分改三輔在後不得以此爲疑也傳又有師
尉大夫田況此則在改郡名以後者

南陵沂水出藍田谷北至霸陵入霸水

師古曰沂音先歷反

齊氏次風攷證云沂水當作澆水各本俱譌水經注
引此條云澆水出藍田谷北至霸陵入霸水趙氏
誠夫水經注釋云全氏曰酈注首尾再引班志似是
沂水卽澆水但不知何以誤澆爲沂而沂又何以有
涅音一清按宏農郡析縣師古音先歷反沂與析字
形相近先歷之音於析則是沂則非也沂水字亦作

塗見渭水注霸陵縣可知本字不誤而其音則非

紹蘭按水經漡水注引地理志曰漡水出南陵縣之

藍田谷又引地理志曰漡水北至霸陵入霸水是志

文本作漡漡字壞而爲沂上林賦曰終始霸漡漡與

霸在八川中二水連文而漡水入霸霸水入渭故相

如謂爲終始矣孟堅作志何爲舍漡而取湑且渭水

注云湑水又西逕嶢關北又西北流入霸水是湑水

雖亦入霸而不言所出其是否出藍田谷尙未可知

誠夫證志又何爲舍六朝人明引志文之漡而取未

詳所出之湑渭水注上云川水又西逕略陽道故城

渠水似非湑水北湑渠水出南山北逕湑峽北入城湑
出天水郡略陽道之南山失之更遠矣其說非是齊

說得之全氏乃游移其詞何也又按師古音沂爲先
厯反則唐初譌析後又譌沂

霸水亦出藍田谷北入渭師古曰茲水秦穆公更名以

章霸功視子孫

沂音先厯反
視讀曰示

錢氏曉徵攷異云此皆班氏本文謂霸水本名茲水
秦穆公始更名耳非師古注也沂音先厯反上當有
師古曰三字紹蘭按錢說是也渭水注云霸者水
上地名也古曰滋水矣秦穆公霸世更名滋水爲霸
水以顯霸功此卽本漢志爲說其明證也

左馮翊縣二十四

韓延壽傳左馮翊二十四縣數與此同

襄德禹貢北條荆山在南下有彊梁原

渭水注云沙苑之南卽懷德縣故城也地理志曰禹
貢北條荆山在南山下有荆渠按荆彊古音可通渠
梁字形互異而無原字河水注云河水又東徐水注
之東南流絕彊梁原寰宇記朝邑縣朝坂下引水經
注云洛水東南歷彊梁原俗所謂朝坂與志合而今
本酈注無此文淮南子墜形訓睢出荆山高誘注荆
山在左馮翊襄德縣之南下有荆漂原莊氏大鴻謂
荆漂原荆彊通漂則梁之誤孫編修云梁古文作淩
形與漂近而譌耳然則渭水注引志誤梁爲渠又脫
原字今本志文固不誤也